

Paayen ti kontra-rebolusyonaryo a gubat ti pasista a rehimen nga US-Duterte! Ipinget nga iyabante ti gubat ti Umili!



Komite Sentral Partido Komunista ti Pilipinas

Ti Komite Sentral ket natibker a saludoan na ti amin a Nalabbaga a mannakigubat ken kumander ti Bagong Hukbong Bayan (BHB) iti okasyon ti maika-52 nga anibersaryo na. Iti daytoy nga aldaw, ited tayo ti kangatuan a panangbigbig iti natibker ken panangited iti amin a kabaelan nga agpursige, dagiti nagun-od ken sakripisyo nga inaramid na iti panangsalaknib iti umili ken panangiyabante ti gubat ti umili iti sango ti naulpit ken narugit a kontra-rebolusyonaryo a gubat ti pasista a rehimen nga US-Duterte.

Iyawat tayo ti kangatuan a pammadayaw kadagiti amin a Nalabbaga a mannakigubat ken kadre ti Partido a nangibuwis ti biag da kabayatan nga agserserbi iti umili ken iti rebolusyonaryo a panggep. Dagiti nagan da ket agnanayon a naikur-it kas bannuar ken martir iti libro ti pakasaritaan ti

naidaklan a pannakidangadang ti umili a Pilipino para iti wayawaya ti pagilian ken gimong.

Iti daytoy nga aldaw, ti sibubukel a Partido ken BHB ket mangted ti ispesyal a pammadayaw kenni Antonio Cabanatan (Ka Manlimbasog), dati a kameng ti Komite Sentral, Pulitikal Bureau

ken Komite Ehekutibo, dinukot a kakuyog ti asawa na a ni Florenda Yap (Ka Osang) idi napan a tawen, limesa naipupok, pinarigat (tinortyur) da iti mano a bulan sabbay a naranggas a pinatay dagiti takrot a mamapatay tao a ni Duterte.

Ni Ka Manlimbasog, a nagretiro idi 2017 manipud iti aktibo a rebolusyonaryo a rebbengen, ket maysa kadagiti natutured a nangusat ti dalan ken nangiyuna iti panagpalawa ti soldado ti umili iti Visayas ken Mindanao. Dakkel ti inted na a kontribusyon iti panangpapigsa ken panangpatibker ti rebolusyonaryo a tignayan.

Salsaludoan met ti Partido ni Rosalino Canlubas (Ka Yuni), kumander ti rehiyon ti BHB iti Cagayan Valley ken maikadua a kalihim ti komite ti Partido iti rehiyon, a natay iti maysa nga engkwentro idi Marso 15 iti Isabel. Ni Ka Yuni ket maysa kadagiti agtutubo a kadre a nabutosan iti maikadua a Komite Sentral gapu kadagiti narimat a tulong na iti panangiyabante ti gubat ti umili iti Southern ken Western Mindanao.

Daytoy nga okasyon ket gundawayan tayo tapno timbangan ti pigsa tayo babaen iti pareho a panangitudo kadagiti nagun-od ken nagkurangan tayo iti napalabas a tawen. Agpursige tayo a padurasen dagiti pagpigsan tayo ken rimbawan dagiti nagkapuyan tapno lumalaing tayo iti panangiyabante ti gubat ti umili babaen ti nalawa ken nairteng a panangisayangkat ti pannakigubat a gerilya basar iti lumawlaw ken umun-uneg a base a masa. Rumbeng met laeng nga adalen tayo ti pagpigsan ken pagkapsutan ti kabusor tapno makabukel ti plano, estratehiya ken taktika tapno paayen ti awanan-sarday ken naranggas a gubat ni Duterte kontra iti umili.

Ti gubat ti umili nga isaysayangkat ti BHB, babaen ti absoluto panangidaulo ti PKP, ket

paset ti 500-tawen nga agtultuloy nga armado a pannakidangadang ti umili a Pilipino kontra kadagiti gangannaet a managsakop ken manangadipen, nga addaan ti immuna a balligi idi Abril 27, 1521 iti Labanan ti Mactan no sadino a pinarmek ni Datu Lapu-lapu ti dakkal a puersa dagiti managsakop nga Espanyol nga indauloan ni Ferdinand Magellan. Iti lima a siglo, iti uneg ti 300 a tawen ti kolonyal a panagari ti Espanyol ken nasurok maysa a siglo met ti kolonyal ken malakolonyal a panangidadanes ti US, ti umili a Pilipino ket napinget a nagisayangkat ti rebolusyonaryo nga armado a panagsalaknib tapno gun-oden ti pudno a nailian a waya-way.

Ti agtultuloy a kumarkaro a sosyo-ekonomiko a kasasaad ti umili a Pilipino ket agtaltalinaed a napakapaborable para iti panangiyabante ti nasaknap ken nairteng a pannakigubat a gerilya. Gapu iti korapsyon, dagiti kontra umili a patakaran, ken pasista a panangikuspil, ti rehimen nga US-Duterte ket pinakaro na ti krisis ti agar-ari a sistema a malakolonyal ken malapyudal a nangted ti nakarkaro a rigat ken pannakairurumen iti nalawa a masa ti umili a Pilipino.

Ti napalabas a tawen ket nangyeg ti awanan-kapada na a panagrigrigat ti nalawa a masa a mangmangged, mannalon, mala-proletaryado ken dagiti petiburges gapu iti palpak a panangsango iti pandemya a Covid-19. Iti panagsanggir na kadagiti restriksyon dagiti militar ken pulis imbes nga agipatungpal kadagiti kasapulan nga addang para iti publiko a salun-at, dinadael ti reaksyunaryo a rehimen ti ekonomya ken pagbiagan ti umili kabayatan a saan na a malapdan ti agtultuloy a panagwaras dagiti impeksyon.


Imbes a tamingen ti pandemya babaen ti panangilatang ti umanay

a rekursor para iti panangsango ti publiko a salun-at, ad-adda pay a pinili ti rehimen nga US-Duterte ti panaggatang ti ad-adu a bomba ken kanyon nga agserbi iti todo nga opensiba militar na iti arapaap a parmeken ti BHB sakbay nga opisyal nga agleppas ti panagtakem na. Iti gandat a parmeken ti BHB, panggep ti agar-ari a grupo ni Duterte a pilayen ti amin a langa ti pannakilaban dagiti demokratiko ken progresibo a puersa tapno isagana ti panagtalinaed ti dinastiya ti korapsyon, pasismo ken nailian a panagtraydor iti labes ti 2022.



Dagiti awanan sarday nga operasyon ti kabusor ket mangtarget kadagiti masa a mannalon ken mangipapaay ti nakaro a panagabusor kadakuada. Panggep ti kabusor a buraken ti panagkaykaysa ti umili ken rebbeken ti pannakilaban da babaen ti panangipauneg kadagiti komunidad iti turay dagiti garison ti militar kadagiti komunidad, a ti kangrunaan a panggep na ket isina ti BHB ken iduron daytoy iti kasasaad a puro-militar no sadino a bulnerable kadagiti dadakkal a panagatake.

Kagiddan na, panggep ti kabusor a buraken ti naparang a demokratiko a tignayan ti masa iti syudad, kasta met ti konserbatibo nga oposisyon.

Ti rebolusyonaryo nga armado a pannakidangadang ket agtultuloy nga agpursige iti sango ti naranggas a kontra rebolusyonaryo a gubat ti kabusor. Dagiti yunit ti BHB ket ipingpinget da a rimbawan dagiti rigat ken kinarikut nga ibungbunga dagiti naulpit nga opensiba ti kabusor. Ipurpursige da a papigsan ti silpo da iti masa a mannalon, salakniban ken tulongan ida a lumaban ken iyabante dagiti antipyudal ken antipasista a pannakilaban da. Babaen iti panangrimbaw kadagiti pagkapuyan ken kinarigat, determinado ti BHB a paayen ti todo nga opensiba ti kabusor ken kagiddan na ket agpapigsan.



Espesyal nga Isyu | Marso 29, 2021

 @prwc_info
 cppinformationbureau@gmail.com

Ti *Ang Bayan* ket ipabpablaak dua a daras iti tunggal bulan ti Komite Sentral ti Partido Komunista ti Pilipinas

Ti sangalubongan a kapitalista a sistema ket nailumlom iti resesyon

TI SANGALUBONGAN A KAPITALISTA A SISTEMA ket inalun-on ti sangalubongan a resesyon idi napalabas a tawen no sadino a ti pandemya ti Covid-19 ket saan a naan-anay a sinango dagiti gubyrno a saan a nakasagana ken kurang iti kabaelan da gapu iti bulok a sistema ti salun-at a dinadael ti manon a tawen a neoliberal a panagkissay iti badyet. Nagturing dagiti kaaduan a gubyrno iti panangipataw kadagiti *lockdown* ken restriksyon iti produksyon, linnakuan ken garaw dagiti tattao. Dagitoy nga addang ket dinadael na ti sibubukel nga ekonomya, nangiserra iti babassit a negosyo ken dadakkel a kumpanya, ken ad-adda a nangikonsentra ti puonan iti ima ti sumagmamano a monopolyo kapitalista.

Dumanon iti 33 milyon ti permanente a naawanan ti trabaho ken 81 milyon pay ti temporaryo a naikkat. Nagsuek ti 42% ti direkta a gangannaet a puonan manipud \$1.5 trilyon idi 2019 a nagturing ti \$859 bilyon iti napalabas a tawen, ken manamnama a bumaba pay iti 5-10% itatta a tawen. Iti intero a lubong, dagiti ekonomya ket lumunglung-aw laeng babaen iti dadakkel a gangannaet a panagutang a nangitambak ti \$24 trilyon iti kasla bantay a \$281 trilyon a salangalubongan a gangannaet nga utang, wenna nasurok 355% ti sangalubongan a *gross domestic product* (GDP).

Nangrugi idi Disyembre ti panagiruar dagiti higante a kumpanya iti parmasyutika ti bakuna kontra iti Covid-19. Para kano iti sangalubongan nga umili ti produksyon, panaglako ken distribusyon dagiti bakuna, ngem, ad-adda laeng a nangipakita iti kapitalista a kinarawet iti ganansya dagiti imperyalista. Bangking ti distribusyon dagiti bakuna a mangpabor kadagiti dadakkel a kapitalista a pagilian. Idi nasapa a paset ti Marso, dimmanonen ti 380 milyon a bakuna ti naitudok iti intero a lubong, no sadino a nasurok a kagudua (55%) ket konsentrado iti United States, China, European Union ken United Kingdom, kabayatan a ti nabati ket nagbibingayan ti 125 a pagilian.

Malaksid iti manamnama a binilbilyon a dolyar ti ganansya nga ibulsa dagiti dadakkel a kumpanya ti parmasyutika (a kaaduan ket immawat ti publiko a pondo iti produksyon

ti bakuna), saan pay a seguridad ti napapanawen a distribusyon dagiti bakuna. Makitan to pay laeng no adda umanay a suplay ti bakuna para iti amin a pagilian, ken no dagitoy a bakuna ket epektibo a mapasardeng na ti panagwaras ti bayrus ken dagiti nadumaduma a tumataud a langa na. Dua a bulan kalpasan dagiti distribusyon, nagipatungpal manen ti sumagmamano a pagilian kadagiti addang ti *lockdown* iti sango ti bigla a panagadu dagiti baro a kaso.

Ti sangalubongan a resesyon iti 2020 ket nangpakaro iti nabayagen nga istagnasyon iti ekonomya manipud pay 2008 a nangdalapus kadagiti mayor a sentro ti kapitalismo nga italtalmeg dagiti problema ti kapitalista a sobra a produksyon ken bumabbaba a tantos ti ganansya. Iti laksid ti pannakailumlom dagiti ekonomya ken panagsardeng ti produksyon, ti produktibo a kabaelan ket nagtalinaed a nangato gapu iti agtultuloy a sobra a suplay kadagiti mayor a produkto, partikular ti asero, bukubukel a taraon, krudo a langis ken dagiti produkto a petrolyo, nangruna idi nagsardeng ti internasyunal a linnakuan ken nagsuek ti pagtagilakuan.

Awan kapada ti dadakkel ti produksyon ken ti saan a nalako nga imbentaryo ti asero iti China iti napalabas a tawen. Tapno lapdan ti panagbaba ti presyo ti krudo a langis, nagkaykaysa ti Saudi Arabia, Russia ken OPEC idi napalabas a bulan a nayonan pay ti panagkissay ti produksyon. Numampay kasta, agsobsobra dagiti produkto a petrolyo a nagugor (refined)

iti China, a nangipababa iti tukad ti tantos ti ganansya ken makagapu ti panagserra wenna panagkissay iti operasyon dagiti planta iti panagugor ti langis iti Singapore, Australia ken dadduma pay a pagilian.

Kalpasan ti mano tawen a sobra ti suplay, adda ti temporaryo a panagkurang ti suplay dagiti *semiconductor* iti sango ti saan a ninamnama a panagdakkel ti panagkasapulan ti *computer, tablet, smartphone, camera* ken dadduma pay nga elektronikong gadget para iti komunikasyon, trabaho a *work-at-home, distance learning* ken pagliwliwaan iti balay nga inbunga dagiti addang gapu iti pandemya. Walopulo a porsyento ti sangalubongan a produksyon dagiti *chip* ket konsentrao iti South Korea ken Taiwan.

Aglinlinnuba itatta dagiti monopolyo kapitalista iti US ken China iti panangibuyat ti binilbilyon a dolyar a puonan iti produksyon dagiti *electronic chip*. Iti partikular, iti uneg ti baro a linteg a National Defense Authorization Act, idurduron met ti gubyrno a Biden ti suporta ken puonan ti estado tapno itandudo ti lokal a produksyon ti *semiconductor* iti panggep a maagaw ti kadakkelan a paset ti ngumatngato a kasapulan. Kagiddan daytoy ti panagpuonan ti estado iti panagsukisok ken produksyon militar. Kapada na, indeklara ti China iti nabiit a maysa iti prayoridad daytoy iti 5-tawen a programa na ti panagsukisok ken produksyon ti *semiconductor, karaman ti artificial intelligence, quantum computing, biotechnology, space research* ken dadduma pay a baro a teknolohiya.

Mano a trilyon a dolyar ti inbuyat dagiti abante a kapitalista a pagilian kadagiti programa a mangparegta tapno papartaken ti panangbiag manen iti ekonomya da, ngem mangpataud met ti peggad ti sobra a panagpudot ti ekonomya ken ti labutab iti utang (debt bubble) a mabalina a bumtak kadagiti masungad a tawen. Iti

addang a mangipangato iti utang ti US a doble iti kadakkel ti ekonomya da, inaprubaran iti nabiit ti gubyrerno a Biden ti maysa nga US\$1.9 trilyon a programa a mangparegta iti ekonomya a mangiwaras ti kuarta iti nganngani amin nga Amerikano tapno awisen ti panaggatang, ken mangted ti subsidyo iti lokal a produksyon. Ginasgasut a bilyon a dolyar met ti plano a gastuen ti dadduma a mayor a kapitalista a pagilian tapno paregtaen dagiti bukod da nga ekonomya, kas ti Japan (US\$710 bilyon), Germany (US\$250 bilyon), United Kingdom (US\$210 bilyon) ken France (US\$210 bilyon). Target met ti China a danonen ti 6% a panaglawa ti ekonomya na babaen iti panangpondo kadagiti korporasyon a kukua ti estado.

Mayorya dagiti atrasado nga ekonomya ti maparigat gapu iti napaut nga epekto ti sangalubongan a resesyon iti ekonomya. Awan pay kapada na ti 124 milyon a nainayon kadagiti nailumlom iti nakaro a kinarigat (agbihiag iti kurang US\$2 tunggal aldaw) idi napalabas a tawen, ken manamnama a dumanon pay iti 150 milyon itatta a 2021. Ad-adda a kimmaro ti saan a panagpapada mainaig iti nasagrap dagiti mangmangged ken mannalon iti kakaruan nga epekto dagiti *lockdown* iti ekonomya. Iti desperasyon a maiyaon iti pannakabangkarote, mapi-lit dagiti atrasado nga ekonomya nga ad-adda nga agutang ken agipatungpal ti nakarkaro a liberalisasyon kadagiti ekonomya ken panangibaba ti sueldo dagiti mangmangged iti pannaki-innuna nga awisen ti gangannaet a kapital ken panagpuonan.

Addan dagiti immuna a pakakitaan a ti baro a gubyrerno ni Biden iti US ket suruten na ti dalan ti militar a kina-agresibo iti tengnga ti kumarkaro a panagriribal nga inter-imperyalista. Nagdeklara ni Biden a siguraduen na babaen iti naan-anay a pigsa ti ekonomya ken pulitikal nga interes ti US iti sango ti dumakdakkal a karit ti imperyalista a karibal na a China. Naiyaramid ti ehersisyo militar iti nabiit nga usar

ti dua a *carrier strike group* iti South China Sea ken Taiwan Strait a direkta a panangkarit iti panangtagikua ti China kadagitoy nga internasyunal a baybay. Biniag na manen ti panangibangon ti Quadrilateral Security Dialog iti baet ti US, Japan, India ken Australia iti panggep a maiposisyon dagiti puersa ken armas militar ti US kadagitoy a pagilian ket ad-adda a lipiten ti China iti ekonomya, militar ken pulitika.

Iti Middle East, agarup makabulan pay laeng a nakatugaw ni Biden idi imandar na ti *missile* a panagatake iti Syria, labsing iti soberano a teritoryo daytoy, kontra kano iti panagibiyahen ti armas manipud Iran. Numampay pinaatiddog ti US ti katulagan da iti Russia a New Start, a manglimitar iti produksyon dagiti estratehiko nga opensibo nga armas, awan pay ti pablaak na a plano nga umatras iti panagpadur-as ken produksyon dagiti armas nukleyar ken dagiti *intermediate range* a *missile* a naparegta iti uneg ti rehimen a Trump. Numampay addan ti immun-una a kari, saan pay nga insubli ti US ti katulagan a nukleyar iti Iran ken saan pay a naikkat ti pananglipit na iti daytoy iti laksid ti pablaak ti Iran a nakasagana daytoy a sumurot kadagiti immuna a katulagan.

Mas agresibo nga idurduron ti China ti kontrol na iti Hongkong ken Taiwan ken itultuloy na ti armado a presensya na iti South China Sea tapno kontraen ti karit ti US iti baybay. Bimtak dagiti labanan iti nagbeddeng na da iti India nga agpeggad a kumaro pay. Nanglukat ti Russia ti baro a base na a nabal iti Sudan tapno pagtalinaeden ti presensya daytoy iti Red Sea, a kabatog ti eropuerto a base na iti Syria ken base a nabal iti Yemen, tapno pagtalinaeden ti kabaelan na a mangkontrol kadagiti estratehiko a ruta iti Middle East ken pagdaliasatan nga agtruong iti Africa.

Iti sango ti pumudpudot a ribalan nga inter-imperyalista, dumakdakkal ti gasto iti militar dagiti agkakaribal iti laksid ti nakaro a krisis iti sangalubongan nga ekonomya. Idi

napalabas a tawen, dimmakel ti 3.9% nga agturong ti US\$1.83 trilyon dagiti gasto iti militar, dua-a-pagkatlo iti US ken China. Agtaltalinaed nga adda iti kangatuan a tukad iti napalabas a 30 tawen ti eksport dagiti mayor nga armas no sadino a ti paset ti US ket ngimmato ti 37%.

Ti kumarkaro a kasasaad sosyo-ekonomiko ken panangibaddek kadagiti sibil a kalintegan ket mangrubrob kadagiti panaglabaan ti umili iti nadumaduma a paset ti lubong iti sango ti pandemya ti Covid 19. Agtultuloy a bumbumtak dagiti welga iti US ken Europe dagiti mangmangged iti transportasyon, dagiti pabrika, restoran ken kadagiti tiendaan a dumawdawat ti nayon a sueldo ken natalged a lugar a pagtrabahuan. Manipud Pebrero, awan-sarday dagiti tignay masa ti ginasut a ribu nga umili ti Myanmar kontra iti kudeta ti militar. Nagtultuloy ti nalawa a protesta dagiti mannalon iti India. Maisaysayangkat met dagiti protesta ti masa iti Brazil, Greece, Thailand, Russia ken dadduma pay a pagilian a mangidurduron kadagiti kiddaw ti umili iti tengnga ti pandemya ken lumablabaan iti panangikuspil dagiti militar ken pulis.

Iti tengnga ti sangalubongan a krisis ti kapitalismo, tumataud dagiti naparang a pasista a rehimen iti umadadu a pagilian. Awan sarday dagiti panagatake kadagiti demokratiko a kalintegan. Ti nakaro a kasasaad a sosyo-ekonomiko ken panangikuspil ti estado ket mangmangted ti kasasaad para iti panagkasapulan ken dagus nga armado a pannakidangadang. Dagiti nakaro a pananggundaway iti uneg ti neoliberal a patakaran ti awan patingga a kinarawet, panangikuspil ti terorismo ti estado ken pasismo, dagiti gyera nga agresyon ket mangidurduron ti nadumaduma a langa ti pannakilaban iti intero a lubong. Dagiti pannakidangadang ti masa nga anti-imperyalista ken demokratiko ken dagiti armado a rebolusyonaryo a panagtignay ket dagiti panagsagana iti panagdalluyon manen ti sangalubongan a proletaryo a rebolusyon.

Kumarkaro a terorismo ti estado kagiddan ti gandat ni Duterte a paatiddogen ti pasista a turay na labes ti 2022

ADDA LAENGEN SUMUROK-KUMURANG a 450 nga aldaw ti rehimen a Duterte sakbay nga agleppas ti opisyal a takem na, isu nga ad-adda a desperado ken naranggas daytoy iti panangdalapus iti amin a lapped iti gandat na nga ipauneg ti pagilian iti pasista a diktadura ken pagbayagen iti poder ti pulitikal a dinastiya na. Ti korapsyon, panagbusbos iti militar ken pulis ken dagiti nakaro a patakaran a neoliberal ket mangbangbangkrup iti reaksyunaryo nga estado, nangilumlom iti pagilian iti kasla bantay nga utang, nangpakaro iti krisis ken nangibutaktak iti rinuker a kaunggan ti agar-ari a sistema a malakolonyal ken malapyudal.

Iti napalabas a tawen, saan nga immannugot ti rehimen a Duterte nga ilatang ti rekursu ti estado kadagiti kasapulan nga addang para iti publiko a salun-at kas ti *mass testing* ken napartak a *contact tracing* tapno makontrol ti pandemya. Saan na kayat a papigsaen ti sistema ti publiko a salun-at a pinarigat ti mano tawen a nakakissayan ti badyet. Ngem ketdi, ginundawayan na ti krisis iti salun-at tapno ipataw dagiti anti-demokratiko a restriksyon, idungpar ti Anti-Terror Law ken ikkan pammalubos ti pulis ken militar iti awanan-asi nga aduan a panagpatay.

Kimmaro ti burukratiko a korapsyon iti panangbukod ni Duterte ti saan a gagangay a bileg tapno iyalis ti kuarta ti pagilian iti bulsa ti pamilya ken dagiti kroni na ken nakaro a panaggasto iti militar. Uray ti panagatang ti bakuna ket tinaktak ti negosasyon dagiti agkakaribal a burukrata nga agkamkamat ti pasukok ken kibbak. Inbilang dagiti syentista ti Pilipinas kas maysa a kadaksan iti panangtaming iti pandemya ti Covid-19. Gapu iti daytoy, agtaltalinaed nga agpeggad ti umili a Pilipino iti impeksyon ti Covid-19. Sangsangoen ti pagilian iti agdama ti bigla a panagadu ti bilang dagiti impeksyon a kangrunaan na ket gapu iti kinaawan dagiti addang para iti salun-at iti tengnga ti panaglukat dagiti pabrika, *mall*, dagiti empresa, ken timmaud dagiti nalaklaka a makaalis a klase ti bayrus.

Ti kadaksan nga aspeto ti malakolonyal ken malapyudal a sistema ket pinakaro ti palpak a panangsango ti Covid-19. Ti panagsanggir kadagiti

lockdown tapno lapdan ti panagwaras ti pandemya, inlumom ni Duterte ti ekonomya ti Pilipinas iti nakaro a krisis. Bimmaba ti 9.5% ti GDP ti pagilian idi 2020. Kabayatan a nabangkrap ken nagserra ti manopulo ribu a babassit ken akintengnga a negosyo, napartak a napasubli dagiti dadakkel a burgesya kumprador dagiti lugi da idi damo na ken naggamgam ti binilbilyon a piso a ganansya, kabayatan a makasagsagrap ti kissay iti buwis ken dadduma pay nga insentibo.

Gapu ta saan nga inannugot ni Duterte nga iyalis ti pondo a para iti korapsyon ken para iti sobra a panaggasto ti militar, nagsanggir daytoy iti panagutang ti dakkel kadagiti gangannaet tapno pondoan kano ti pandemya. Idi 2020, nagbulod ti nayon a ₱2.1 trilyon isu a dimmanon ti kabuklan a publiko nga utang iti ₱9.8 trilyon idi agleppas ti tawen. Ad-adda pay a ngimmato iti ₱10.33 trilyon gapu ta agtultuloy latta nga agutang. Iti kaanuman, ti publiko nga utang ket saanen a kabaelan a bayadan.

Ti nalawa a masa a Pilipino ti nangsagrap ti sinaplit dagiti *lockdown* ken addang a manangikuspil. Nakaro a nailumlom ti kasasaad a sosyo-ekonomiko dagiti mangmangged ken mannalon, mala-proletaryado ken nababa a petiburgesya. Idi Enero, nasurok 10.5 milyon a Pilipino ti naawanan ti trabaho a nakagapu iti bigla a panagadu ti tantos ti awanan trabaho ken kurang a trabaho iti tukad nga awan pay kapada na. Nakasagrap da kadagiti pannakakissay ti sueldo, pannakapukaw

ti sapul, nakangatngato a presyo, maka-padagsen a buwis ken dadduma pay a manangadipen nga addang iti sango ti nakaro a krisis iti ekonomya.

Idurduron dagiti pabor iti liberalisasyon ken napeklan a tao ni Duterte ti ad-adda a liberalisasyon ti ekonomya babaen iti panangamendar iti konstitusyon 1987 tapno palubosan ti sibubukel a panagtagikua dagiti gangannaet iti ekonomya ti pagilian ken dagiti natural a rekursu, ken dagiti empresa ken posible nga agserbi a pangallilaw (Trojan Horse) tapno maikkaat ti naikeddeng a panawen a panagtakem iti poder. Panggep da a naan-anay a pukawen dagiti elemento ti nailian a kapital ken pagbalinen a bukod a pagarian dagiti gangannaet a monopolyo kapitalista ken dagiti kakumplot da a dadakkel a kumprador ti ekonomya.

Idi Pebrero, kinarintar nga impasa ti reaksyunaryo a kongreso ti *Create Law* tapno kissayan ti buwis dagiti korporasyon manipud iti 30% nga agturong iti 25% pabor kadagiti gangannaet nga empresa ken kasosyo da a dadakkel a burgesya kumprador. Manamna a makissayan ti ₱251 bilyon ti makulkolekta a buwis a seguridad a maipabaklay kadagiti mangmangged ken dagiti nababa ti sapul na iti langa dagiti baro a buwis wenna nayon a baklayen a gangannaet nga utang.

Maipanpanakkel ti *Create Law* a tulbek iti panangawis kadagiti gangannaet a panagpuonan, nga ulbod a mailadlawan a makina ti panagdur-as ti ekonomya, nga uray iti panawen a ti sangalubongan a sistema ti kapitalista ket kimmapsut iti intero a lubong. Idi napalabas a tawen, ti aplikasyon para iti gangannaet a panagpuonan ditoy Pilipinas ket nagsuek ti 71% manipud iti ₱370.11 bilyon nga agturong ₱112.12 bilyon. Ti kinapudno na, dagiti gangannaet a panagpuonan, kaaduan kadagiti empresa para iti eksport, ket saan a makatultulong iti panangpapigsa iti

pundasyon ti ekonomya, ken manggundaway laeng iti nalaka a pigsat'tegged ken natural a kinabaknang ti pagilian.

Gapu iti korapsyon, militarismo ken panagsanggir iti gangannaet nga utang, seguridad nga agsagaba ti pagilian iti ad-adda a panagkaro ti krisis iti ekonomya ken ti agtultuloy a saplit ti pandemya kadagiti masungad a tawen. Dagiti narangas a *lockdown* ken nasaknap a kinaawan ti trabaho ket mangmangted ti nakaro a rigat iti masa, mangrubrob iti nasaknap a pungtot, mangidurduron kadakuada a lumaban ken mangaw-awis iti adu nga umili a tumipon iti armado a pannakidangadang tapno labanan ken papanawen iti poder ti rehimen nga US-Duterte.

Al-alaen ni Duterte ti suporta ti baro a guberno a Biden ti US iti pasista a rehimen na. Indasar na ti panangibabawi iti "terminasyon" ti Visiting Forces Agreement (VFA) wenna panangbukel iti sabali a katulagan a mangted iti US ti naan-anay a karbengan a sumrek-rummuar iti pagilian a kasukat ti dakdakkal a tulong militar. Indeklaran na nga umannugot nga agimbak ti US kadagiti armas na iti pagilian para iti estratehiko nga *outpost* daytoy iti rehiyon. Tapno ipakita ti suporta ti US, nagkari ti Pentagon ti US nga ingato ti tulong militar ken panagilako kadagiti helikopter ken dadduma pay a ramit militar, a nakaragsakan ti militar ti Pilipinas.

Bayat nga agtultuloy a mangted ti tulong militar iti rehimen a Duterte, pumigpigs a panangiduron ti US iti guberno ti Pilipinas a paatrasen ti dumakdakkal nga impluwensya iti pulitika, interes iti ekonomya ken militar a pannakibiang ti China. Kabayatan nga agtultuloy nga agkurkurno ti rehimen iti diktat ti China, adda dagiti maka-US nga opisyal a nalatak a mangkontra iti China, kas ti naipakita iti pannakaibabawi ti proyekto nga eropuerto iti Sangley Point ken naparang a protesta iti linteg ti China a mangipalpalubos kadagiti Coast Guard a paputokan dagiti

lugaran iti baybay a saan a kukua ti Chinese.

Ngem kasapulan nga agballigi da pay laeng a kontraen ti pito nga artipisyal nga isla nga intakder ti China kas base militar iti West Philippine Sea ken kontra iti panagitakder kadagiti torre ti *cellphone* nga iggem ti China a Dito-Telecom iti uneg dagiti kampo militar ti AFP, iti laksid ti napinget a panangkontra dagiti maka-US nga opisyal. Pappapigsan ti China dagiti militar ken diplomatiko a kontra-addang babaen ti panagurnong ti puersa militar na iti South China Sea karaman ti panagangkla ti nasurok 220 a lugaran ti milisya iti Juan Felipe Reef, nga adda iti uneg ti eksklusibo a sona iti ekonomya ti Pilipinas.

Gapu iti nakaro a krisis ti agar-ari a sistema, bumabassit ti rekursu iti ekonomya ken pulitika a pagbibingayan dagiti nadumaduma a paksyon ti agar-ari a dasig. Kas iti napalabas, agpangpanggep ti agar-ari a grupo ni Duterte a pagbayagen ti bukod iti poder tapno agtultuloy nga aggamgam ti kinabaknang ken bileg babaen kadagiti burukrata kapitalista nga operasyon. Gapu iti krisis, ad-adda a pimmigsa ti duron tapno imonopolyo ti bileg pulitika a kagiddan ti otoritarianismo ti tirano a ni Duterte.

Ti gandat ni Duterte nga ipakat ti pasista a diktadura iti umili ken pagbayagen iti poder ti pulitikal a dinastiya ken ti agar-ari a grupo na ket pakaiblangan ti panangbaliw iti konstitusyon wenna direkta a panangideklara ti linteg militar wenna "rebolusyonaryo a guberno" (panangagaw iti absoluto a bileg). Mabalina met nga ituloy ken kusiten ti eleksyon ti presidente iti 2022 tapno ipatugaw ti anak na a babae wenna pasurot na iti pulitika. Ti TIM a kasosyo ti Smartmatic ket naipakaammo a nagatangen ti tao na a ni Dennis Uy tapno makontrol ti panagbilang ti butos iti eleksyon 2022 kas ti naaramid idi 2019.

Napateg a paset ti gandat ni Duterte nga agturay kas pasista a diktador

wenna panangpaatiddog ti panagturay ti dinastiya na ket ti panangikuspil iti ligal demokratiko a tignayan ken ti panangpairteng ti kontra-rebolusyonaryo a gubat daytoy. Panggep na a pilayen dagiti puersa a nailian-demokratiko ken iti kasta ket pakapsuten ti nalawa nga intar dagiti puersa a demokratiko a lumablabaen iti tiraniko a rehimen na. Panggep na met laeng nga ikonsolida ti tengngel na iti militar ken pulis babaen iti panangited kadakuada ti nayon a bileg.

Ad-adda a nangranggas ken mamapatay ti manangikuspil a gubat ni Duterte. Iturturong daytoy ti National Task Force to End Local Communist Armed Conflict (NTF-ELCAC), ti hunta sibil-militar na, nga iti agdama ket mangkunkontrolen iti sibubukel a burukrasya ken armado a makinarya ti estado. Gapu iti Anti-Terror Law ken durog ni Duterte a "patayen amin," ad-adda a pimmigsa ti pakinakem dagiti puersa a pulis ken militar nga iyaramid ti tuloy-tuloy a pangikuspil, a pakakitangan kadagiti koordinado a reyd, aduan a panagtiliw ken dagiti masaker. Kadagiti naglabas a bulan, rinaut dagiti AFP ken PNP dagiti balay ken opisina dagiti lider masa ken aktibista dagiti ligal a saan a komunista nga organisasyon iti Panay, Southern Tagalog, Bicol ken Northeast Mindanao, simmaruno kalpasan dagiti reyd iti Negros ken National Capital Region a naawagan a Synchronized Enhanced Managing of Police Operations (SEMPO). Amin a biktima ket in-*red-tag* ti NTF-ELCAC. Bayat a lumawlawag dagiti plano ni Duterte a pagtalinaeden ti bukod ken ti dinastiya na iti poder kadagiti sumaruno a bulan, manamnama nga umad-adu ken nangranggas a panagraut ti aramid na iti ad-adu a rehiyon.

Agarup uppaten a tawen a nangranggas ti kontra-rebolusyonaryo a gubat ti rehimen nga US-Duterte nga addaan panggep nga ikuspil ti masa a mannalon ken pameken ti BHB. Us-usaren na ti karugitan ken karangasan a taktika ti panangikuspil iti masa a mannalon iti

uneg ti nagtipon nga Oplan Kapanganagan ti AFP ken PNP. Dagiti sibubukel a baryo ken komunidad ti naipauneg iti garison ti militar ken *ala-hamlet* a panagkontrol. Naipauneg dagiti mannanon iti ekstrahudisyal a pammapatay, iligal a panagrikisa ken panagtiliw, dagiti interogasyon, pananglapped iti taraon ken ekonomya, puersado a panagrekut, *curfew*, panagibales ken kolektibo a panagdusa kalpasan dagiti taktikal nga opensiba ti BHB, ken dagiti awanan sarday a kampanya ti pamutbuteng ken saywar (“community support program,” puersado nga “aduan a panagpasuko,” E-CLIP, BDP) iti awanan namnama a mangputed ti silpo ti BHB ken ti base a masa a mannalon.

Agtultuloy a pappapartaken ti rehimen a Duterte ti panangpalawa ti makinarya ti AFP ken panagagatang kadagiti baro nga armas kabayatan nga agisaysayangkat ti awan-sarday a nailian nga opensiba kontra iti BHB. Iti laksid ti kinakurang ti badyet ken dagus a kasapulan a pondoan dagiti programa para iti publiko a salun-at ken panangparegta ti produksyon ti ekonomya,

binilbilyon a piso ti binusbos ti rehimen a Duterte para kadagiti nayon a helikopter, *drone*, eroplano a panggubat, *missile*, bomba, kanyon ken armas a pangkombat. Nagilatang ti nasurok ₱19 bilyon para iti NTF-ELCAC kas *pork barrel* a pondo.

Nagisayangkat ti kabusor ti nagsasaruno a nalawa nga opensiba militar manipud 2018. Dagitoy “nakapokus nga operasyon militar,” a nakapaunegan ti pareho nga operasyon a kombat ken saywar, gagangay a mangsaksakop ti mano nga ili, pinullo a barangay kadagiti nagbebeddeng dagiti probinsya, ken mapatpatignay ti mano gasut a tropa iti daga ti nagtipon a dua wenno mano a batalyon ti AFP ken dagiti panglaban a tropa ti PNP. Dagitoy ket suportado ti paniktik a Drone ken ti sobra ken awanan asi a panagbomba manipud iti tangatang ken panagkanyon kadagiti nalalagan ken nadadagsen nga artileri, a saan a mangikonkonsidera iti kinatalged dagiti sibilyan nga agnaed kadagiti asideg a komunidad. Kakumbina daytoy ti awan sarday a saywar ken panangikuspil iti masa a mannalon ken komunidad dagiti

minorya iti panggep a kubkoban ken nakaro a butbutngen ti umili.

Iti desperado a gandat a gun-oden ti inpablaak da a panggep a parmeken ti BHB sakbay nga agleppas ti takem (term) ni Duterte, nagisayangkat ti AFP ti todo a nailian nga opensiba a nangpatignay ti 150 a batalyon ti AFP ken dagiti tropa a pangkombat ti PNP, no sadino ket nasurok 80% ket nakakonsentra iti walo a prayoridad a rehiyon, nga addaan 14 agingga na 20 batalyon ti tunggal maysa. Manipud idi napalabas a tawen, pinanggep ti AFP a makarekruit ti saan a bumaba ti 9,000 a nayon a puersa a paramilitar kas nayon iti 70,000 a CAFGU.

Numampay kasta, mapaay ti kontra rebolusyonaryo a gubat ken todo nga opensiba ti kabusor kabayatan nga agpurpursige ti BHB iti dalan ti gubat ti umili, agpalawa ken agkonsolida ti base a masa na ken papigsan ti bukod na iti militar ken pulitika. Ti kinarangas ti gubat ti kabusor ket iparparang ti kinaruker ti malakolonyal ken mala-pyudal a sistema ken mangririing iti nauneg a pungtot ti masa kadagiti pasista ken iti agar-ari a sistema.

Agpurpursige ti BHB iti tengnga ti todo a kontra-rebolusyonaryo a pangikuspil

ITI SANGO TI KONTRA-REBOLUSYONARYO a gubat ken nalawa nga opensiba militar ti AFP ken PNP a suportado ti US, agtultuloy nga agpurpursige ti Bagong Hukbong Bayan iti dalan ti naunday a gubat ti umili nga agsagsagrap ti nauneg ken nalawa a suporta ti masa a mannalon ken ti umili a Pilipino. Pinaay na ti tinawen a maipabpablaak a plano ti rehimen nga US-Duterte a “parmeken ti BHB.” Pursigido daytoy a paayen ti plano ti rehimen a buraken ti armado a rebolusyon sakbay nga agleppas ti takem na ken iyabante ti demokratiko a rebolusyon tapno rebbeken ti naindasigan a turay ti imperyalismo nga US, dadakkel a burgesia kumprador ken dadakkel nga apo’t daga.

Idi maitakder daytoy idi Marso 29, 1969, addaan laeng ti 60 a mannakigubat ti BHB nga addaan ti siyam a riple nga awtomatik ken 26 a nababa ti klase na a paltog ken addaan base a masa nga 80,000 iti aglawlaw ti maikadua a distrito ti probinsya ti Tarlac. Babaen iti nagtipon nga armado a pannakidangadang, rebolusyon nga

agrario ken panagitakder ti base a masa, dimmur-as ti BHB a nagbalin a maysa a nailian a hukbo nga addaan manoribu nga agtutubo a Nalabaga a mannakigubat a naggapu iti intar dagiti mairurumen ken magungundawayan a masa. Naarmasan da ti nangato ti kalibre na a riple a nasamsam manipud iti kabusor, kasta met kadagiti bukod

nga aramid nga explosibo ken nainsigundan nga armas. Iti base a masa na a dumanon iti minilmilyon, agtigtignay ti BHB iti nasurok 110 a larangan a gerilya a plano a manayonan pay.

Intakder ken pinatibker ti Partido ti BHB tapno ipatungpal ti kangrunaan a rebolusyonaryo a rebbengen nga agawen ti bileg pulitikal babaen iti panangrebbek iti reaksyunaryo nga estado ken panagitakder ti demokratiko a guberno ti umili. Tapno mapadur-as ti BHB manipud iti bassit ken nakapsut, nga agturong iti dakkel ken napigsa, inpatungpal ti Partido ti estratehiko a linya ti naunday a gubat ti umili a panangkubkob iti syudad manipud kaaw-awayan. Pinetpetan ken inpatungpal daytoy ti prinsipyo

ti sentralisado a panangidaulo ken desentralisado nga operasyon kas pamuspusan ti panangipatungpal ti rebolusyonaryo a gubat kadagiti isla ti Pilipinas. Dumur-as iti tallo a tukad ti naunday a gubat ti umili: estratehiko a depensiba, estratehiko a patas ken estratehiko nga opensiba. Mabalin a sakop ti tukad ti estratehiko a depensiba ti kaatiddogan a panawen no sadino a kasapulan ti BHB ti agurnong ti pigsa babaen ti panangisayangkat ti nasaknap ken nairteng a pannakigubat a gerilya basar iti lumawlaw ken umun- uneg a base a masa.

Iti panagisayangkat ti naunday a gubat ti umili, pagtiptiponen ti BHB ti tallo a ramen ti armado a pannakidangadang, rebolusyon nga agraryo ken panagitakder ti base a masa. Iti armado a pannakidangadang, agisaysayangkat ti BHB kadagiti taktikal nga opensiba, a pilien na laeng dagiti labanan a seguridad a maipagballigi a mangtartarget iti nakasina ken nakakapsut a paset ti armado a puersa ti kabusor. Us-usaren na dagiti pamuspusan a gerilya ti panagkonsentra ti puersa tapno bumira, panagsisina (dispersal) tapno paidaman ti kabusor ti target ken panagalit iti erya tapno lumiklik iti panagkubkob ti kabusor. Iti amin a panawen, liklikikan ti BHB a mabirukan ti kabusor babaen ti panangusar ti kadagaan ken panagsanggir iti masa.

Iti panangisayangkat ti rebolusyon nga agraryo, ipatpatungpal ti BHB ti Rebolusyonaryo a Tarabay iti Reporma iti Daga ti Partido. Iti tukad ti estratehiko a depensiba, ririingen, or-organisaren ken patpatignayen ti BHB ti masa a mannalon kadagiti pannakilaban ti masa ken kampanya iti panangipababa ti abang iti daga panangipababa ti interes iti utang, panangingato ti tangdan ti mangmangged iti agrikultura ken mangmangged talon, panangipangato ti presyo ti apit, panangipababa ti abang dagiti ramit a pagtalon, panagitakder kadagiti kooperatiba ken grupo ti tinnulong

tapno maipangato ti produksyon ken kita manipud kadagiti dadduma a pagsapulan. Kadagiti naglabas a tawen, dagiti daga a napanawan wenna inted dagiti apo't daga ket sinakop ken inwanwan dagiti organisasyon ti mannalon babaen iti tulong ken tarabay ti BHB ken dagiti lokal a sangay ken nangatngato a komite ti Partido.

Iti panagitakder ti rebolusyonaryo a base a masa, or-organisaren ti Partido ken BHB dagiti lokal a sangay ti Partido, dagiti rebolusyonaryo nga organisasyon ti masa a mannalon, agtutubo, babbai ken dagiti ubbing, trabahador iti kultura, ken dagiti yunit milisya ti BHB kadagiti baryo. Basar iti organisado a pigsa ti masa, maisayangkat dagiti asembleya wenna kumperensya ti masa tapno ibutos ti komite a rebolusyonaryo iti baryo nga addaan rebbengen nga iwanwan dagiti lokal a patakaran a mangsakop iti reporma iti daga ken produksyon, patakaran iti salun-at, edukasyon, bambanag iti militar, urnos ken talna, ken dadduma pay. Agserserbi dagiti komite kas bin-i ti demokratiko a guberno ti umili a naan-anay a maitakder iti panawen ti nailian a panangagaw iti bileg pulitika.

Dimmur-as ti naunday a gubat ti umili manipud iti nasapa a subtukad ti estratehiko a depensiba nga agtruong iti tengnga a tukad manipud idi tengnga ti dekada 1980. Numampay kasta, naaddaan kadagiti nakaro a panagatras ken pannakapaay idi maudi a paset ti dekada 1980 aginggana ti nasapa a paset ti dekada 1990 gapu kadagiti kamali ti adbenturismo militar ken nasapa a regularisasyon wenna panagbukel kadagiti puersa a bertikal nga awan ti kabatog na nga umanatop a kadakkel ti puersa a horisontal. Ti sobra a panagurnong ti puersa para iti trabaho militar ket pinakapsut na dagiti nangun-od iti panagitakder ti base a masa ken pinagbalin na a bulnerable kadagiti atake ti kabusor ken pannakapaay kadagiti labanan. Pinanggep dagiti rebisyonista ken traydor a sistematiko a tallikudan ti estratehiko a linya ti

gubat ti umili babaen iti panangkillo iti panagusig ti Partido iti gimong a Pilipino, dagiti dasig ken moda ti produksyon iti panggep nga iturong ti puersa iti dalan ti pannakaabak.

Insayangkat ti Komite Sentral ti PKP ti Maikadua a Naindaklan a Tignayan ti Panagilinteg idi 1992 tapno pasingkeda manen dagiti basaran a prinsipyo ti Partido, ti panagusig a iti malakolonyal ken malapyudal a kasasaad ti pagilian ken programa na para iti demokratiko a rebolusyon ti umili babaen iti panangisayangkat ti naunday a gubat ti umili. Iti partikular, inlaksid ken pinarut daytoy ti ramut ti insureksyunismo ken ti saan a napapanawen a regularisasyon ken immandar iti BHB nga ipakat manen ti puersa na tapno pareho a mabalanse ti trabaho militar ken politika wenna trabaho a masa.

Ti lima tawen a programa ti Komite Sentral (2018-2022) ket panggep na a makumpleto dagiti rekisito ti tengnga a tukad babaen ti panagitakder kadagiti platun kas basaran a pormasyon, ti bilang ken pakat dagiti larangan a gerilya, ti husto a balanse dagiti bertikal ken horisontal a yunit iti istruktura ti puersa ti BHB, ti kangrunaan nga anihilatibo a galad dagiti taktikal nga opensiba a punoan dagiti nasaknap nga atritibo nga aksyon, husto a kombinasyon ti armado a pannakidangadang, rebolusyon nga agraryo ken panagitakder ti base a masa, ken ti panangrisut kadagiti nadumaduma a langa ti "Kannigid" ken Kannawan a nagkapuyan.

Panggep ti Partido a risuten dagiti disbalanse iti baet ti trabaho militar ken pulitika a nanglapped iti sustenido a panagdakkel kadagiti napalabas a tawen. Maibilang ditoy dagiti sobra a panagsisina ken sobra a panagsaklaw dagiti yunit ti BHB iti maysa a bangir, ken ti sobra a konsentrasyon ken kina-akikid ti saklaw a lugar iti sabali a bangir. Iti sumagmamano nga erya, nakapalawa ken nakagun-od kadagiti balligi iti militar ti BHB ngem napaay a tuloytuloy

a patignayen dagiti mannalon kadagiti antipyudal a pannakilaban. Iti dadduma nga erya, dagiti yunit ti BHB ket sobra a nagsisina para iti trabaho a masa ngem napaay iti nairut a kumbinasyon ti panagbukel ti hukbo ken iti armado a pannakidangadang. Iti aniaman a kaso, nagbalin a narigat nga isustine dagiti balligi a nagun-od iti tay-ak militar wenno pulitika ken nailukat ti BHB ken base a masa kadagiti pagkapuyan ken panagatras.

Ipingpinget dagiti mangidadaulo a komite ti Partido ken dagiti sentro ti kumand ti BHB a gun-oden ti balanse iti pakat dagiti puersa da, iti panagipatungpal ti trabaho militar ken pulitika ken iti panagpalawa ken panagkonsolida. Kagiddan na, manipud agleppas ti 2017, sinango da dagiti awanan-sarday a panagatake ken narungsot a kampanya ti kontra-rebolusyonaryo a panangikuspil nga insayangkat ti kabusor kontra iti masa a mannalon ken BHB. Adda sumagmamano a paset ti BHB ken base a masa a nakasagrap kadagiti dangran iti sango ti awanan sarday ken nasaknap nga atake ti kabusor a nangpakaro kadagiti agraraira nga internal a pagkapuyan ken bulnerabilidad. Numampay kasta, dakkel a mayorya dagiti kumand ti BHB iti intero a pagilian ket addaan kabaelan nga idauloan ti soldado ti umili nga agisayangkat ti nasaknap ken nairteng a pannakigubat a gerilya basar iti lumawlawaw ken umun- uneg a base a masa. Padpadur-asen da dagiti pamuspusan ken taktika tapno ipreserba ti puersa da, salakniban ti umili ken biraen dagiti pasista a kriminal ken mammapatay-tao.

Nalagda ti tali a nangreppet ti BHB ken iti masa a mannalon. Agtaltalinaed a natibker dagitoy iti laksid ti awan sarday a gandat ti kabusor a pugsaten dagitoy. Nagipatungpal ti BHB kadagiti pamuspusan tapno itultuloy dagiti rebolusyonaryo a trabaho - panagorganisa, edukasyon, propaganda, kampanya a masa, panagbukel ti Partido, panagawis ti kameng ti BHB - uray pay iti tuktok ti

agong ti kabusor. Iti pananglaban ken panangrimbaw iti garison ti militar ken kampanya a saywar ti kabusor, agad-adaw kadagiti adal ken inspirasyon ti BHB ken masa a mannalon iti kapadasan ti umili ken rebolusyonaryo a puersa ti Vietnam tapno labanan ken rimbanwan dagiti pasista a hamlet.

Agpurpursige met dagiti yunit ti BHB iti trabaho nga ekspansyon tapno lumawa ti erya ti operasyon dagiti larangan a gerilya ken buklen dagiti baro a larangan a gerilya. Iti panangipatungpal iti daytoy, napalawa ti BHB ti erya ti maniobra, napuersa ti kabusor nga ad-adda a binnaten iti naingpis dagiti puersa na ken pagbalin a narigrigat ken nagasto dagiti panagkubkob ti kabusor kadagiti yunit ti BHB. Uray kadagiti erya nga adda iti uneg ti prayoridad ti kabusor, balligi a nakapagpalawa dagiti yunit ti BHB iti baro a teritoryo wenno nasubliyan dagiti sigud nga erya. Agtultuloy nga iwanwanwan dagiti kumand ti BHB ken komite ti Partido ti panangipakat kadagiti puersa na tapno malisyan ti problema ti sobra a pannakabinnat wenno akikid a pagtigtignayan.

Babaen ti nalawa a suporta ti masa ken kaammuan iti kadagaan, agtultuloy a rimimbawan ti BHB dagiti nakapokus nga operasyon militar ken agisayangkat kadagiti taktikal nga opensiba, mangbira kadagiti agwaywayas wenno nakasina a kampo ti kabusor. Pursigido daytoy nga agisayangkat ti ad-adu pay nga anihilatibo a taktikal nga opensiba (ambush ken reyd) nga addaan ti kangrunaan a panggep nga agawen ti armas ti kabusor, ken gididdanan kadagiti atritibo nga aksyon militar (haras, isnayp ken demolisyon kadagiti pasilidad ti kabusor).

Ti panagpurpursige ti BHB nga agisayangkat ti rebolusyonaryo nga armado a pannakilaban ket mangmangted ti inspirasyon ken mangpappapigsa iti nakem ti masa nga agirussuat kadagiti anti-imperyalista, antipyudal ken antipasista a pannakilaban ti masa ken labanan ti pasista a rehimen nga US-Duterte ken ti panagari daytoy

a terorismo ti estado iti tengnga ti nakaro a sosyo-ekonomiko a krisis ken kumarkaro a langa ti panangadipen ken pananggundaway iti uneg ti malakolonyal ken malapyudal a sistema.

Iti kaaw-awayan, pumigpiga ti pakinakem ti masa a mannalon ken dagiti minorya a komunidad nga agirussuat kadagiti pannakilaban nga antipyudal ken labanan ti panagagaw ti daga ken panagserrek kadagiti aneutral a daga ti dadakkel nga apo't daga, dadakkel a kumpanya ti panagminas, eko-turismo ken enerhiya. Dagiti marigrigat a mangngalap ket maidurduron nga ilaban ti kalintegan da ken pagimbagan kontra iti panaggamgam dagiti dadakkel a komersyal a pagkalap ken panagserrek dagiti Chinese a supsuportaran ti estado da kadagiti lugar a pagkalapan iti pagilian.

Iti syudad, agtultuloy a lumawlawaw ti intar dagiti demokratiko a puersa kontra iti tiraniko a rehi-men. Naitakderti alyansa dagiti konserbatibo nga oposisyon ken dagiti progresibo ken demokratiko a puersa tapno sangoen ti dinastiya ni Duterte iti eleksyon 2022. Kagiddan daytoy, agtultuloy nga agisaysayangkat dagiti mairurumen a dasig ken demokratiko a sektor kadagiti kampanya ken pannakilaban a masa tapno ilaban ti kalintegan ken pagimbagan da. Agkidkiddaw da ti nayon a sueldo, natalged a lugar a pagtrabahuan, bayad iti peggad, dagus a tulong iti pagbiagan tapno masukatan ti napukaw a sapul da gapu iti *lockdown* ken restriksyon, nayon a sueldo dagiti mangmangged iti salun-at, mangisursuro ken empleyado, nayon a badyet para iti natalged a panaglukat dagiti eskwelaan, libre a *mass testing* ken libre a nasaknap a panagbakuna kontra iti Covid-19, ken dadduma pay. Ipakpakita da ti kinatibker ken tured iti pananglaban iti todo a terorista a panagatake dagiti puersa ti estado. Adu kadakuada ti maidurduron nga agkameng iti BHB wenno agpasalakinb kadagiti base a gerilya ti BHB.

Ipinget nga ibaklay dagiti rebbengen ti BHB iti pannakilaban

KADAGITI MASUNGAD A TAWEN, rumbeng nga ipinget ti Bagong Hukbong Bayan nga ipatungpal dagiti napapateg ken naririgat a rebbengen tapno iyabante ti interes ken pagimbagan ti masa a mannalon ken salakniban ida kadagiti abuso ken atake dagiti puersa ti estado, papigsaen ti BHB, paayen ti naulpit a kontra-rebolusyonaryo a gubat ken agtultuloy nga iyabante ti gubat ti umili iti nangatangato a tukad. Dawdawaten ti sitwasyon iti tunggal Nalabbaga a mannakigubat ken kadre ti Partido ti dadakkel a sakripisyo ken landok a disiplina, kasta met ti pangngeddeng, kinatured, kinamanagparnuay ken ti awan patingga a panagtalek iti masa.

Iti pananglaban iti kabusor, iggem ti BHB ti estratehiko a linya ti naunday a gubat ti umili ken nairut a makipagkaykaysa ti masa ken napnuan bileg a lumaban a kakuyog ida. Sigseguraduen na ti nailian a pakat ti armado a pannakilaban, kasta met ti pakat iti tunggal rehiyon ken subrehiyon. Ti Partido ken ti BHB ket us-usarenna ti Marxista-Leninista-Maoista a panirigan ken pamuspusan tapno risuten dagiti dagus a problema iti panangiyabante ti gubat ti umili, agadal kadagiti kapadasan ti dadduma a pagilian, kasta met ti pakasaritaan ti rebolusyonaryo a pannakidangadang iti Pilipinas.

Rumbeng a paunegen ken papigsaen ti BHB ti rebolusyonaryo a base a masa. Daytoy ti tulbek iti panangpaay ken panangrimbaw iti kontra-rebolusyonaryo a gubat ti kabusor. Rumbeng nga ad-adda pay a pairuten ti silpo ti BHB iti masa babaen ti napinget a panangiyabante iti antipyudal a tignay masa kas tulbek iti panangriing, panangorganisa ken panangpatignay iti masa a mannalon iti kaaw-awayan. Rumbeng a kanayon nga ikkan pateg ti BHB ti pagimbagan ti masa a mannalon ken kangatuan a prayoridad ti panangiyabante ken panangipatungpal kadagiti kiddaw da nga antipyudal a mayannurot iti linya ti minimum a programa ti Partido iti reporma iti daga. Rumbeng nga ikagumaan ti

BHB ken dagiti rebolusyonaryo a puersa iti kaaw-awayan nga aduan a patignayen ti masa a mannalon tapno ilaban dagiti kalintegan ken irupir ti pananggibus dagiti kontra-mannalon a patakaran, regulasyon ken linteg; ken agisayangkat kadagiti kampanya tapno ingato ti produksyon nga agrikultural ken sapul nangruna iti tengnga ti nakaro a krisis iti ekonomya. Rumbeng a saan a mabannog iti trabaho a propaganda ken edukasyon iti intar ti masa tapno ipangato ti kaamuan da iti pulitika, riingen ti unget da ken patibkeren ti pangngeddeng da a lumaban. Ti amin a yunit ti BHB ket rumbeng a nakasilpo iti masa a mannalon ken ipatungpal ti rebbengen da kas giya iti pulitika, brigada iti produksyon, duktor ken dentista, mangisursuro, trabahador iti kultura ken dadduma pay a rebbengen da kas soldado ti umili.

Rumbeng a kanayon nga ikagumaan ti BHB a makikaykaysa iti masa a mannalon, kangrunaan nga agsanggir kadagiti marigrigat ken nababa nga akintengnga a mannalon ken mangmangged talon, awisen dagiti tengnga nga akintengnga a mannalon, ken nyutralisaen ti baknang a mannalon ken dagiti nalawlawagan nga apo't daga, gundawayan dagiti kontradiksiyon iti baet dagiti nalawlawagan ken despotiko nga apo't daga tapno isina ken buraken ti turay dagiti pyudal ken despotiko.

Rumbeng a nainget a labanan ti BHB ken masa a mannalon dagiti atake ti kabusor, ti panangsa-kop wenno panaggarison kadagiti baryo. Rumbeng a saan da a mabannog ken managparnuay nga agisayangkat kadagiti trabaho iti intar ti masa tapno ipangato ti pangngeddeng da a labanan ti kampanya ti todo a panangikuspil ti kabusor. Rumbeng a kontraen ken labanan ti kaadda dagiti abusado a tropa ti militar ken pulis kadagiti sibilyan a komunidad nga awan patingga iti panangliplipit ken panangabusong iti masa. Seguraduen a saan a mapugsat ti rebolusyonaryo a propaganda, edukasyon ken kampanya uray pay adda dagiti puersa militar iti baryo. Rumbeng a rimbawan dagiti inkeddeng da a pasista a restriksyon babaen iti umanatop a pamuspusan ti limed a komunikasyon ken miting, kasta met ti taktika ti naparang a saan a panangsurot, panangkontra ken pannakilaban. Rumbeng nga agtultuloy nga itakder ken papigsaen dagiti lokal a sangay ti Partido, rebolusyonaryo nga organisasyon ti masa ken dagiti yunit ti milisya kadagiti baryo. Rumbeng a mangplano ti masa ti nadumaduma a taktika ti pannakilaban tapno iyabante dagiti laban da para iti sosyo-ekonomiko ken protesta iti kaadda ken panagabusong ti militar iti baryo da. Rumbeng a magiddanan daytoy kadagiti armado nga aksyon dagiti yunit ti BHB nga addaan koordinasyon kadagiti yunit ti milisya iti baryo. Ti kinaranggas dagiti puersa ti AFP ken PNP iti kaaw-awayan ket rumbeng nga aktibo nga ibutaktak iti midya ken *social media*.

Rumbeng nga agtultuloy a

paregtaen ti Bagong Hukbong Bayan ti panagrekrut kadagiti baro a Nalabbaga a mannakigubat manipud iti masa a mannalon, kasta met kadagiti mangmangged ken petiburges nga intelektual iti syudad. Rebbengen dagiti sangay ti Partido nga awisen dagiti kadre ken kameng ti Partido, aktibista a masa, dagiti kameng ti milisya nga agkameng iti BHB, ken mangted kadagiti irekomenda da iti soldado ti umili. Kakuyog dagiti yunit ti BHB, rebbengen da met a seguraduen a dagiti pamilya dagiti Nalabbaga a mannakigubat ket nasayaat a mataming ken regular a maikkan ti suporta a materyal ken pinansyal. Mabalina maaddaan ti tallo wenno innem a bulan a *tour-of-duty* wenno integrasyon iti hukbo dagiti kameng ti yunit ti milisya ti umili tapno nayunan ti puersa dagiti seksyon a yunit gerilya kadagiti larangan. Rumbeng nga ikkan ti partikular a dagsen ti rekrutment dagiti mangmangged ken agtutubo nga intelektwal tapno tumulong iti panagsanay iti ideolohiya ken pulitika iti BHB. Dagiti masa nga aktibista iti syudad ken sentro ti ili, nangruna dagiti liplipiten ti pasista a rehimen, ket rumbeng nga awisen nga agkameng iti BHB wenno salakniban daytoy.

Rumbeng nga agtultuloy nga amin-a-benneg a papigsaen ti BHB ti bukod na. Rumbeng a regular nga agisayangkat dagiti yunit na ti panagsanay a pulitiko-militar tapno ipangato ti kabaelan dagiti Nalabbaga a mannakigubat. Rumbeng nga ipangato na ti kaammuan na iti pulitika ken kinasagana iti ideolohiya babaen iti awan panakabannog a propaganda ken edukasyon iti intar da. Rumbeng a siguraduen ti panangiharas ti *Ang Bayan* ken ti kolektibo a panagadal ditoy ken dagiti pablaak ti Partido ken publikasyon dagiti rehion kadagiti amin a yunit ti BHB. Rumbeng a dumanon

iti 100% ti literasiya ti amin a Nalabbaga a mannakigubat. Rumbeng a seguraduen ti salun-at da a pisikal ken mental. Rumbeng nga agipatungpal ti tunggal yunit ti BHB ti panagdillaw ken panagdillaw iti bukod a bagi tapno rimbawan dagiti pagkapuyan ken papigsaen ti panagkaykaysa ken panagtittinnulong ti tunggal maysa. Rumbeng nga ingato ti kabaelan ti tunggal yunit ti BHB nga agpakaawat, agorganisa ken mangpatignay ti masa babaen iti panangpapigsa ti kabaelan da nga agaramid ti panagsukisok ti gimong, propaganda, edukasyon, ken kampanya a masa. Dagiti amin a yunit ket rumbeng a regular nga agisayangkat ti pisikal nga ehersisyo, panagtarget, panagsanay iti labanan ken dagiti *battle games* tapno ipangato ti kinaalibtak, ken kabaelan iti agtignay a sangsangkamaysa.

Rumbeng nga agpalawa a kasala dalluyon ti BHB ti teritoryo wenno erya ti operasyon daytoy, nga addaan balanse ti panagpalawa ken konsolidasyon. Iti maysa a benneg, saan na a rumbeng a baybay-an a maitali dagiti yunit iti limitado nga erya ti operasyon iti atiddog a panawen; ken, iti sabali a bangir, saan na a rumbeng a sobra a binnaten wenno pagsisinaen dagiti yunit ti BHB. Rumbeng a regular a kanayon a sublian nga adalen (ireview) dagiti mangidadaulo a komite ti Partido ken kumand ti BHB ti pakat dagiti puersa ti BHB kas maiyannurot iti prinsipyo iti istruktura ti puersa ti BHB ken dagiti linteg ti panagduras ti pannakigubat a gerilya. Rumbeng nga iplano dagiti kumand ken komite ti Partido iti tukad ti rehion, subrehion, ken larangan ti kalendaryo ken programa para iti panagpalawa ti BHB tapno ma-koordinar ti nadumaduma a yunit ti BHB ken ti kondukta ti gubat. Rumbeng nga adda plano tapno

pagsilpuen dagiti interyor nga erya iti patag, kadagiti kalsada ken igid ti baybay. Rumbeng a patignayen dagiti lokal a kameng ti Partido, dagiti masa nga aktibista ken kameng ti milisya ti umili tapno tumulong iti panagpalawa ti BHB kadagiti kabangibang a barangay ken ili.

Rumbeng nga agipatungpal ti BHB kadagiti nasaknap ken nairteng a pannakigubat a gerilya. Rumbeng nga agirusuat ti BHB kadagiti taktikal nga opensiba a seguro a napartak na a maipagballigi. Rumbeng a pilien na dagiti nakasina, agwaywayas ken nakapsut a puersa militar, pulis ken paramilitar kas target ti anihilasyon tapno makasamsam kadagiti armas ken suplay. Rumbeng nga iplano met ti BHB a rauten dagiti ditatsment ti paramilitar ti kabusor, taktikal nga *outpost*, ken linya ti suplay. Rumbeng nga iplano da met a biraen ken dadaelen dagiti helikopter, *drone*, eroplano a pagbomba ken dadduma pay a ramit ti kabusor iti tangatang. Rumbeng a paaduen ken pairtengen dagiti yunit a panglaban ti BHB dagiti taktikal nga opensiba da ken labanan iti kabusor nga ababa laeng ti panawen ti panaginana. Rumbeng nga agipakat da kadagiti yunit wenno tim dagiti Nalabbaga a mannakigubat nga agipatungpal kadagiti atake kontra kadagiti linya ti transportasyon ken komunikasyon ti kabusor. Rumbeng a nasaknap a mapatignay dagiti yunit ti milisya ti BHB tapno agisayangkat kadagiti kabaelan da a taktikal nga opensiba. Rumbeng nga agideploy kadagiti yunit partisano ti BHB kadagiti syudad ken sentro ti ili tapno arestaren wenno dusaen dagiti pasista a kriminal a responsable iti kampanya ti aduan a pampapayat ken terorismo ti estado kontra iti masa.

Rumbeng a paayen ti BHB dagiti nakapokus nga operasyon militar ken todo nga opensiba ti kabusor, dagiti operasyon a kombat ken saywar ken panangikuspil iti masa. Rumbeng nga ited da amin a kabaelan da tapno pagbalinen nga awan serbi dagiti nangingina a ramit iti panagmanman (surveillance) ken napigpigma nga armas babaen iti panangipaidam iti kabusor ti target. Rumbeng a pagtalinaeden ti nangato a disiplina militar ken ipatungpal dagiti istrikto nga addang ti panaglimes kadagiti temporaryo a pagkampoon (tugot, asuk, silaw ken uni) ken iti panagtignay tapno maliklikan a matiktikan ti kabusor babaen kadagiti ipauna ti kabusor nga agobserba (scout), espiya, panagobserba ti *drone*, panagala ti signal dagiti elektroniko a ramit ken panagusar kadagiti ramit iti *geotracking*. Rumbeng nga agpadur-as kadagiti baro a limes a ruta ti suplay. Rumbeng nga agisayangkat ti kontra-paniktik ken buraken dagiti iket (net) ti espiya ti kabusor. Rumbeng a nainget a bantayan ken amirisen ti BHB dagiti plano ken garaw ti kabusor, ken agisayangkat kadagiti gerilya a maniobra tapno umadayo iti pokus ti kabusor,

lumiklik iti panagkubkob ti kabusor ken piliten ti kabusor a dumanog iti angin ken agbusbos ti rekurso.

Rumbeng nga agipakat dagiti platun ti BHB kadagiti iskwad ken tim dagiti Nalabbaga a mannakigubat tapno umatake manipud iti likudan ti kabusor a manggulo iti plano ken tignay da. Kakuyog ti BHB dagiti lokal a sangay ti Partido ken rebolusyonaryo nga organisasyon ti masa ket rumbeng nga agplano ken mangbukel kadagiti taktika ken pamuspusan iti pulitika ken militar tapno ibutaktak, sangoen, labanan ken parmeken ti kampanya ti panangikuspil ti kabusor iti tukad ti komunidad ken interkomunidad. Rumbeng a patignayen dagiti yunit ti milisya ken komite iti panagsalaknib tapno agisayangkat ti nasaknap nga atake militar ken armado nga aksyon tapno taktaken dagiti opensiba a plano ti kabusor.

Rumbeng a papigmaen ti panangidaulo ti Partido iti BHB iti amin a tukad. Rumbeng a regular nga isayangkat dagiti kumperensya militar tapno agsisinnukat ti impormasyon dagiti kadre militar, amirisen ken gupgopen dagiti kapadanan, maaramid ti koordinasyon ken makabukel dagiti taktika ken plano iti erya ti operasyon da. Rumbeng

nga organisado dagiti sangay ti Partido ken regular ti taray na iti uneg dagiti kumpanya ken platun ti BHB. Rebbengen dagiti sangay ti Partido nga ingato ti pulitikal a kaammuan ken rebolusyonaryo a kinasagana dagiti Nalabbaga a mannakigubat ti BHB ken papigmaen ti panagkaykaysa da, mangiyuna iti panagdillaw ken panagdillaw iti bagi ken panagmuli iti bukod a bagi.

Ti nakaro a krisis iti pulitika ken ekonomya ti agturturay a sistema ket pabor iti panangiyabante ti gubat ti umili. Ti nalawa a masa ti umili a Pilipino ket bumangbangon a lumaban tapno gibusan ti nakaro a kinakurapay, kinarigat, bisin ken panagabusos iti uneg ti tiraniko a rehimen. Ti nailian-demokratiko a rebolusyon ket ad-adda ken dagus a kasapulan iti sango ti tumadtadem a krisis ken dagiti saan a mabaklay a langa ti panangirurumen ken pananggundaway. Para iti umili a Pilipino, awan ti sabali a pamuspusan no saan a ti panangisayangkat ti rebolusyonaryo a pannakidangadang tapno rebbeken dagiti manangidadan ken manggundaway kadakuada.

Gibusan ti pasista a rehimen ni Duterte!

Ipinget a papigmaen ken palawaen ti Bagong Hukbong Bayan ken ti base a masa daytoy!

Pairtengen ti pannakigubat a gerilya ken paayen ti naulpit ken kontrarebolusyonaryo a gubat ti kabusor!

Iyabante ti gubat ti umili!

Agbiag ti Bagong Hukbong Bayan!

Agbiag ti Partido Komunista ti Pilipinas!